

四庫全書

集部

欽定四庫全書

集部

華陽集卷中

詳校官太常寺少卿臣陳廷森

檢討臣何思鈞覆勘

覆校官中書臣王慶長

校對官中書臣孫球

謄錄監生臣余嘉穎

欽定四庫全書

華陽集卷中

唐 顧況 撰

七言古詩

行路難

君不見古人燒水銀變作北邙山上塵
藕絲掛在虛空中欲落不落愁殺人
睢水英雄多血刃建章宮闕成煨燼
淮王身死桂樹折徐福一去音書絕
行路難行路難生死有命皆由天
秦皇漢武遭不脫汝獨何人學神仙

君不見擔雪塞井徒用力炊砂作飯豈堪喫一生肝膽
向人盡相識不如不相識冬青樹上挂凌霄歲晏花凋
樹不凋凡物各自有根本種禾終不生豆苗行路難行
路難不知何處是平道中心無事當富貴今日覺君顏
色好君不見少年頭上如雲髮少壯如雲老如雪豈知
灌頂有醍醐能使清涼頭不熱呂梁之水挂飛流竈鼉
蛟蜃不敢遊少年恃險若平地獨倚長劍凌清秋行路
難行路難昔日少年今已老炫目春光不長好前朝竹

帛事皆空日暮牛羊古城草

英華無炫
目春光句

悲歌三首 并序

情思發動聖賢所不免也故師乙陳其宜延陵審
其音理亂之所經王化之所興信無逃於聲教豈
徒文彩之麗遂作歌以悲之

邊城路今人犁田昔人墓岸上沙昔時江水今人家今
人昔人共長嘆四氣相催節迴換明月皎皎入華池白
雲離離度清漢我欲昇天天隔霄我欲渡水水無橋我

欲上山山路險我欲汲井井泉遙越人翠被今何夕獨
立沙邊江草碧紫燕西飛欲寄書白雲何處蓬萊客

二 一作遠
思曲

新繫青絲百尺繩心在君家轆轤上我心皎潔君不知
轆轤一轉一惆悵何處春風吹曉幕江南綠水通朱閣
美人二八顏如花泣向春風畏花落臨春風聽春鳥別
時多見時少愁人一夜不得眠瑤井玉繩相對曉

三 一作攀
龍引

軒轅黃帝初得仙鼎湖一去三千年周流三十六洞天
洞中日月星辰聯騎龍駕景遊八極軒轅弓劍無人識
東海青童寄消息

宜城放琴客歌

并序

琴客宜城愛妾也宜城請老愛妾出嫁不禁人之
欲而私耳目之娛達者也况承命作歌

佳人玉立生北方家住邯鄲不是倡頭髻髮鬢手爪長
善撫琴瑟能文章新研籠裙雲母光朱弦綠水喧洞房

忽聞斗酒初決絕日暮浮雲古離別巴猿啾啾峽泉咽
淚落羅衣顏色暈不知誰家更張設絲履墻偏釵股折
南山闌干千丈雪七十非人不暖熱人情厭薄古共然
相公心在持事堅上善若水任方圓憶昨好之今棄捐
服藥不如獨自眠從他更嫁一少年

李湖州孺人彈箏歌

武帝昇天留法曲淒情掩抑絃柱促上陽宮人怨青苔
此夜想夫憐碧玉思婦高樓刺壁窺愁猿叫月鸚呼兒

寸心十指有長短妙入神處無人知獨把梁州凡幾拍
風沙對面胡秦隔聽中忘却前溪碧醉後猶疑邊草白
鄭女彈箏歌

鄭女八歲能彈箏春風吹落天上聲一聲雍門淚承睫
兩聲赤鯉露鬢鬣三聲白猿臂拓頰鄭女出參丈人時
落花惹斷遊空絲高樓不掩許聲出差殺百舌黃鶯兒

劉禪奴彈琵琶歌

感相國
韓公

樂府只傳橫吹好琵琶寫出關山道羈鴈出塞繞黃雲

邊馬仰天嘶白草明妃愁中漢使迴蔡琰愁處胡笳哀
鬼神知妙欲收響陰風切切四面來李陵別書寄蘇武
自有生人無此苦當時若值霍驃姚滅盡烏孫奪公主

李供奉彈箏篔篋歌

國府樂手彈箏篔赤黃條索金鍔頭早晨有勅鴛鴦殿
夜靜遂歌明月樓起坐可憐能抱撮大指調弦中指撥
腕頭花落舞衣裂手下鳥驚飛撥刺珊瑚席一聲一聲
鳴錫錫羅綺屏一弦一弦如撼鈴急彈好遲亦好宜遠

聽宜近聽左手低右手舉易調移音天賜與大弦似秋
鴈聯聯度隴關小弦似春燕喃喃向人語手頭疾腕頭
軟來來去去如風卷聲清泠泠鳴索索垂珠碎玉空中
落美女爭窺玳瑁簾聖人卷上真珠箔大弦長小弦短
小弦緊快大弦緩初調鏘鏘似鴛鴦水上弄新聲入深
似太清仙鶴遊秘館李供奉儀容質身才稍稍六尺一
在外不曾輒教人內裏聲聲不遣出指剝葱腕削玉饒
鹽饒醬五味足弄調人間不識名彈盡天下崛竒曲胡

曲漢曲聲皆好彈着曲髓曲肝腦往往從空入戶來瞥
瞥隨風落春草草頭只覺風吹入風來草即隨風立草
亦不知風到來風亦不知聲緩急蕤玉燭點銀燈光照
手實可憎只照箏篴弦上手不照箏篴聲裏能馳鳳闕
拜鸞殿天子一日一迴見王侯將相五馬迎巧聲一日
一迴變實可重不惜千金買一弄銀器胡瓶馬上馱瑞
錦輕羅滿車送此州好手非一國一國東西盡南北除
却天上化下來若向人間實難得

諒公洞庭孤橘歌

不種自生一株橘誰教渠向堦前出不羨江陵千木奴
下生白蟻子上生青雀雛飛花蒼菊旃檀香結實如綴
摩尼珠洞庭橘樹籠煙碧洞庭波月連沙白待取天公
放恩赦儂家定作湖中客

蕭鄂草書歌

蕭子草書人不及洞庭葉落秋風急上林花開春露濕
花枝濛濛向水泣見君數行之灑落石上之松松下鶴

若把君書比仲將不知誰在凌雲閣

杜秀才畫立走水牛歌

崑崙兒騎白象時時鑱着獅子項奚奴跨馬不搭鞍立
走水牛驚漢官江村小兒好誇騁脚踏牛頭上牛領淺
草平田擦過時大蟲着鈍幾落井杜生知我戀滄洲畫
作一障張床頭八十老婆拍手笑妬他織女嫁牽牛

苔蘚山歌

野人夜夢江南山江南山深松桂閑野人覺後長歎息

帖蘚黏苔作山色閉門無事任盈虛終日欹眠觀四如
一如白雲飛出壁二如飛雨巖前滴三如騰虎欲咆哮
四如懶龍遭霹靂嶮峭嵌空潭洞寒小兒兩手扶欄干

同裴觀察東湖望山歌

浴鮮積翠棲靈異石洞花宮橫半空夜光潭上明星啟
風雨壇邊樹如洗水淹徐孺宅恒乾繩墜洪崖井無底
主人載酒東湖陰遙望西山三四岑

瑤草春 并序

隴西李迅者納別宅監奴出迅不喜欲訪故人為
刺史配嫁強而配焉既歸而不合監奴投井而死
因作瑤草春歌以悲之

瑤草春香容與江南艷歌涼西舞執心輕子都信節冠
秋胡議以腰支嫁時論自有夫蟬鬢蛾眉明井底燕裙
趙袂縈轆轤李生聞之淚如綆不忍迴頭看此井月中
桂樹落一枝池上鷓鴣啼孤影露桃穠李自成蹊溪水
終天不向西翠帳綠窻寒寂寂錦茵羅薦夜淒淒瑤草

春丹井遠別後相思意深淺

險竿歌

宛陵女兒擘飛手長竿橫空上下走已能輕險若平地
豈肯身為一家婦宛陵將士天下雄一下定却長弰弓
翻身挂影恣騰躅反綰頭髻盤旋風飛鳥驚猿遶樹枝
裏頭打鼓不聞時手蹉脚踏蜘蛛絲忽雷掣斷流星尾
矐睽劃破蚩尤旗若不隨仙作仙女即應嫁賊生賊兒
中丞方畧通變化外戶不扁從女嫁

洛陽行送洛陽韋七明府

始上龍門望洛川
洛陽桃李艷陽天
最好當年二三月
上陽宮樹千花發
疏家父子錯掛冠
梁鴻夫妻虛適越

黃鵠樓歌送獨孤助

故人西去黃鵠樓
西江之水上天流
黃鵠杳杳江悠悠
黃鵠徘徊故人別
離壺酒盡清絲絕
綠嶼沒餘烟白沙
連曉月

廬山瀑布歌送李顧

飄白霓挂丹梯應從織女機邊落不遣潯陽潮向西
火雷劈山珠噴日五老峯前九江溢九江悠悠萬古情
古人行盡今人行老人也欲上山去上箇深山無姓名

露青竹鞭歌

鮮于仲通正當年章仇兼瓊在蜀川約束蜀兒採馬鞭
蜀兒採鞭不敢眠橫截斜飛飛鳥邊繩橋夜上層崖巔
頭插白雲跨飛泉採得馬鞭長且堅浮漚丁子珠聯聯
灰煮蠟揩光爛然章仇兼瓊持上天上天雨露何其偏

飛龍閑廐馬數千朝飲吳江夕秣燕紅塵撲轡汗濕韉
獅子麒麟聊比肩曲江昆明洗刷牽四蹄踏浪頭枿天
蛟龍稽顙河伯虔拓羯胡雛脚手鮮陳閔韓幹丹青妍
欲貌未貌眼欲穿金鞍玉勒錦連乾騎入桃花楊柳烟
十二樓中奏管弦樓中美人奪神仙爭愛大家把此鞭
祿山入關關破年忽見揚州北邨前祗有人還千一錢
亭亭筆直無皴節磨捋形相一條鐵市頭終是無人別
江海賤臣不拘絀垂鞘挂影西窓缺稚子覓衣挑仰穴

家僮拾薪幾拗折玉潤猶霑玉壘雪碧鮮自染萇宏血
蜀帝祠邊子規咽相如橋上文君絕往年策馬降至尊
七盤九折橫劒門穆王八駿超崑崙安用冉冉孤生根
聖人不貴難得貨金玉珊瑚誰買恩

八月五日歌

四月八日明星出摩耶夫人降前佛八月五日佳氣新
昭成太后生聖人開元九年燕公說奉詔聽置千秋節
丹青廟裏貯姚宋花萼樓中宴岐薛清樂靈香幾處聞

鸞歌鳳吹動祥雲已於武庫見靈鳥仍向晉山逢老君
率土溥天無不樂河清海宴窮寥廓梨園弟子傳法曲
張果先生進仙藥玉座淒涼遊帝京悲翁迴首感承明
雲韶九奏杳然遠惟有五陵松栢聲

金璫玉珮歌

贈君金璫太霄之玉珮金鑲禹步之流珠五嶽真君之
秘錄九天丈人之寶書東井沐浴辰巳畢先進洞房上
奔日借問君欲何處來黃姑織女機邊出

公子行

輕薄兒面如玉紫陌春風纏馬足雙鞵懸金縷鶻飛長
衫刺雪生犀束綠槐夾道陰初成珊瑚幾節敵紅星紅
肌拂拂酒光凝當堦背拉金吾行朝遊夔夔鼓聲發暮
遊夔夔鼓聲絕入門不肯自升堂美人扶踏金階月

幽居弄

苔衣生花花露滴月入西林蕩東壁扣商占角兩三聲
洞戶深窻一冥寂獨去滄洲無四鄰身嬰世網此何身

關情命曲寄惆悵久別山南山裏人

朝上清歌

潔眼朝上清綠景開紫霞皇皇紫微君左右皆靈娥曼
聲流睇和清歌些至陽無諛其樂多些旌蓋颺沓簫鼓
和些金鳳玉麟鬱駢羅些反風名香香氣遐些瓊田瑤
草壽無涯些君着玉衣升玉車些欲降瓊宮玉女家些
其桃千年始着花些蕭寥天清而滅雲目瓊瓊兮情感
珮隨香兮夜聞肅肅兮愔愔啓天和兮洞靈心和為丹

兮雲為馬君乘之觴于瑤池之上兮三光羅列而在下

烏啼曲

玉房掣鎖聲翻葉銀箭添泉霜遠一作遠霜堞畢逋撥刺日

一作銜城八九雛飛其母驚此是天上老鷓鳴我聞一作

人間老鷓無此聲搖風雜珮耿華燭夜聽羽人彈此曲東

方曛曛赤日旭

邱少府小鼓歌

地盤山鷄猶可像坎坎砰砰隨手長夜半高樓沉一作客

醉時萬里踏橋亂山響

范山人畫山水歌

山崢嶸水泓澄漫漫汗汗一筆耕一草一木棲

一作淒神

明忽如空中有物物中有聲復如遠道望鄉客夢遶山
川身不行

稽山道芬上人畫山水歌

鏡中

一作湖

真僧白道芬不服朱審李將軍錄

疑作漫

汗平

鋪洞庭水筆頭點出蒼梧雲且看八月十五夜月下看

山盡如畫

一作畫分

梁司馬畫馬歌

畫精神畫筋骨一團旋風瞥滅沒仰秣如上賀蘭山低
頭欲飲長城窟此馬昂然獨出羣阿爺是龍飛入雲黃
沙枯磧無寸草一日行過千里道展處把筆欲描時司
馬一駒賽傾倒

五言律詩

洛陽早春

何地避春愁終年憶舊遊一家千里外百舌五更頭客
路偏逢雨鄉山不入樓故園桃李月伊水向東流

步虛詞

迴步遊三洞清心禮七真飛符超羽翼焚火醮星辰殘
藥沾鷄犬靈香出鳳麟壺中無窄處願得一容身

送友失意南歸

衣揮京洛塵完璞伴歸人故國青山徧滄江白髮新鄰
荒收酒幔屋古布苔茵不用通名姓漁樵共主賓

南歸

老病力難任，猶多鏡雪侵。
鱸魚消宦況，鷗鳥識歸心。
急雨江帆重，殘更驛樹深。
鄉關殊可望，漸漸入吳音。

閑居自述

榮辱不關身，誰為踈與親。
有山堪結屋，無地可容塵。
白髮偏添壽，黃花不笑貧。
一樽朝暮醉，陶令果何人。

奉酬劉侍郎

幾迴新秋影，壁滿蟾又缺。
鏡破似傾臺，輪斜同覆轍。
雖

分上林桂還照滄洲雪
暫伴憔悴人歸華耿不滅

酬唐起居前後見寄二首

愁人空望國驚鳥不歸林
莫話彈冠事誰知結襪心
霜凋樹吹斷土蝕劒痕深
欲作懷沙賦明時耻自沉

二

何處弔靈均江邊一老人
漢儀君已接楚奏我空頻直
道其如命平生不負神
自傷庚子日鵬鳥上承塵

奉酬茅山贈賜并簡綦母正字

玉帝居金闕，靈山幾處朝。
簡書猶有畏，神理詎能超。
鶴廟新家近，龍門舊國遙。
離懷結不斷，玉洞一吹簫。

空梁落燕泥

卷幕差池燕，常啣濁水泥。
為黏珠履迹，未等畫梁齊。
舊點痕猶淺，新巢緝尚低。
不緣頻上落，那得此飛棲。

經徐侍郎墓作

不知山吏部，墓作石橋東。
宅兆鄉關異，平生翰墨空。
夜泉無曉日，枯樹足悲風。
更想幽冥事，唯應有夢同。

鄴公合祔挽歌

草露前朝事荆茅聖主封空傳餘竹帛永絕舊歌鐘清
鏡無雙影窮泉有幾重笳蕭最悲處風入九原松

相國晉公挽歌二首

玉節朝天罷洪爐造化新中和方作聖太素忽收神盛
德橫千古高標出四隣欲知言不盡處處有遺塵

二

凝笳催曉奠丹旆向青山夕照新塋近秋風故吏還本

期光漢代從此掃胡關今日天難問浮雲滿世間

晉公魏國夫人柳氏挽歌

魚軒海上遙鸞影月中銷雙劍來時合孤桐去日凋
夕陽迷隴隧秋雨咽笳蕭畫翼無留影銘旌已度橋

義川公主挽詞

弄玉吹簫後湘靈鼓瑟時月邊丹桂落風底白楊悲
雜珮分泉戶餘香出總帷夜臺飛鏡匣偏共掩娥眉

歷陽苦雨

襄城秋雨晦楚客不歸心
亥市風煙接隋宮草路深
離憂翻獨笑用事感浮陰
夜夜空塔響惟餘蚯蚓吟

蚯蚓集作

靖蛭

酬揚州白塔寺永上人

塔上是何緣香燈續細煙
松枝當麈尾柳絮替蠶綿
浮草經行徧空花義趣圓
我來雖為法暫借一床眠

送李道士

人境年虛擲仙源日未斜
羨君乘竹杖辭我隱桃花
鳥

去寧知路雲飛似憶家莫愁客鬢改自有紫河車

鄱陽大雲寺一公房

盡日陪遊處斜暉竹院清定中觀有漏言下證無生色
界聊傳法空門不用情欲知相去近鐘鼓兩聞聲

題攝山棲霞寺

明徵君舊宅陳後主題詩跡在人亡處山空月滿時寶
瓶無破響道樹有低枝已是傷離客仍逢斬尚祠

經廢寺

不知何世界有處似前朝石路無人掃松門被火燒斷
幡猶挂刹故板尚搭橋數卷殘經在多年字欲銷

蕭寺樞松

淒淒百卉病亭亭雙松迴直上古寺深橫拂秋殿冷輕
響入龜息片陰栖鶴頂山中多好樹可憐無比並

白蘋洲送客

莫信梅花發由來漫報春不才充野客扶病送朝臣闕
下搖清珮洲邊採白蘋臨流不痛飲鷗鳥也欺人

送韋秀才赴舉

鄱陽中酒地楚老獨醒年
芳桂君應折沉灰我不燃
洛橋浮逆水關樹接非煙
唯有殘生夢猶能到日邊

送使君

天中洛陽道海上使君歸
拂霧趨金殿焚香入瓌闈
山亭傾別酒野服間朝衣
他日思朱鷺知從小苑飛

春鳥詞送元秀才入京

春來繡羽齊暮向竹林栖
禁苑銜花出河橋隔樹啼
尋

聲知去遠顧影念飛低別有無巢燕猶窺幕上泥

別江南

江城吹曉角愁殺遠行人漢將猶防虜吳官欲向秦布
帆輕白浪錦帶入紅塵將底求名宦平生但任真

傷大理謝少卿

舊館絕逢迎新詩何處呈空留封禪草已作岱宗行柳
蠹風吹折一作折階崩雪遶平無因重來此剩哭兩三聲

五言排律

樂府

暖谷春光至宸遊近甸榮雲隨天仗轉風入御簾輕翠
蓋浮佳氣朱樓倚太清朝臣冠劍退宮女管弦迎細草
承雕輦繁花入幔城文房開聖藻武衛宿天營玉醴隨
觴至銅壺逐漏行五星含土德萬姓徹中聲親祀先崇
典躬推示勸耕國風親正樂農器近銷兵道德關河固
刑章日月明野人同鳥獸率舞感昇平

寄江南鶴林寺石冰上人

山川重復出心地暗相逢忽憶秋江月如聞古寺鐘湖
平南北岸雲抱兩三峯定力超香象真言攝毒龍風中
何處鶴石上幾年松為報烟霞道人間共不容

送從兄使新羅

六氣銅渾轉三光玉律調河宮清奉賁海嶽晏來朝地
絕提封入天平錫貢饒揚威輕破虜柔服耻征遼曙色
黃金闕寒聲白鷺潮樓船非習戰驄馬是嘉招帝女飛
銜石鮫人賣淚綃管寧雖不偶徐市儻相邀獨島緣空

翠孤霞上沈寥蟾蜍同漢月
蟠螭異秦橋水豹橫吹浪
花鷹迥拂霄晨裝凌莽渺
夜泊記招搖幾路通圓嶠何
山是沃焦颶風晴自起陰火
暝潛燒鬢髮成新髻人參
長舊苗扶桑啣日近折木帶
津遙夢向愁中積魂當別
處銷臨川思結網見彈欲求
鴉共散羲和歷誰差甲子
朝滄波仗忠信譯語辨謳謠
疊鼓鯨鱗隱陰帆鷁首飄
南溟垂大翼西海飲文鯨
指景尋靈草排雲聽洞簫封
侯萬里外未肯後班超

獨遊青龍寺

春風入香剎
暇日獨遊行
曠然蓮花臺
作禮月光面
乘茲第八識
出彼超二見
擺落區中緣
無邊廣宏願
長廊朝雨畢
古木時禽轉
積翠暖遙原
雜英紛似霰
鳳城騰日窟
龍首橫天堰
蟻步避危階
蠅飛響深殿
大通智勝佛
幾劫道場現

七言律詩

宿湖邊山寺

羣峯過雨澗淙淙松下扉
扃白鶴雙香透經窻籠檜栢
雲生梵宇濕幡幢蒲團僧
定風過席葦岸漁歌月墮江
誰悟此生同寂滅老禪慧力
得心降

湖南客中春望

鳴鴈嘹嘹北向頻綠波何處
是通津風塵海內憐雙鬢
涕淚天涯慘一身故里音書
應望絕異鄉景物又更新
便拋印綬從歸隱吳渚香尊
漫吐春

閑居懷舊

日長鼓腹愛吾廬洗竹澆花興有餘
騷客空傳成相賦
晉人已負絕交書
貧居謫所誰推轂
仕向侯門耻曳裾
今日思來總皆罔
汗青功業又何如

送大理張卿

秋色依依傷解攜
月卿今夜泊隋堤
白沙洲上江離長
綠樹村邊謝豹啼
遷客此來無倚仗
故人相去隔雲泥
越禽唯有南枝分
目送孤鴻飛向西

五言絕句

春懷

園鶯啼已倦，樹樹墮香紅。
不是春相背，當由已自翁。

洛陽陌

鶯聲滿御隄，柳拂絲齊風。
送名花落香紅，襯馬蹄。

其二

珂珮逐鳴騶，王孫結伴遊。
金丸落飛鳥，乘興醉青樓。

寄淮上柳十三

葦蕭中闕戶，相映綠淮流。
莫訝春潮濶，鷗邊可泊舟。

送李泌

昔別吳隄雨春帆去較遲江波千里綠

闕

山中夜宿

涼月掛層峯蘿牀落葉重掩關深畏虎風起撼長松

登樓

高閣成長望江流鴈叫哀淒涼故吳事麋鹿走荒臺

江上

江清白鳥斜蕩槳罾蘋花聽唱菱歌晚迴塘月照沙

溪上

採蓮溪上女舟小怯搖風驚起鴛鴦宿水雲撩亂紅

田家

帶水摘禾穗夜搗具晨炊縣帖取社長嗔怪見官遲

宿山中僧

不爇香爐烟蒲團坐如鐵嘗想同夜禪風墮松頂雪

梅灣

白石盤盤磴清香樹樹梅山深不吟賞孤負委蒼苔

憶鄱陽舊遊

悠悠南國思
夜向江南泊
楚客斷腸時
月明楓子落

春草謠

春草不解行
隨人上東城
正月二月色
綿綿千里萬里
傷人情

六言絕句

歸山作

心事數莖白髮
生涯一片青山
空林有雪相待
古道無

人獨還

過山農家

板橋人渡泉聲苑
簷日午鷄鳴莫
嗔焙茶煙暗却喜晒
穀天晴

思歸

不能經綸大經甘作草莽
閑臣青鎖應須長別白雲漫
與相親

七言絕句

宿昭應

武帝祈靈太乙壇
新豐樹色繞千官
那知今夜長生殿
獨閉空山月影寒

憶故園

惆悵多山人復稀
杜鵑啼處淚沾衣
故園此去千餘里
春夢猶能夜夜歸

聽角思歸

故園黃葉滿青苔
夢後城頭曉角哀
此後斷腸人不見

起行殘月影徘徊

洞庭秋日

青草湖邊日色低
黃茆嶂裏鷓鴣啼
丈夫飄泊今如此
一曲長歌楚水西

江村亂後

江村日暮尋遺老
江水東流浩浩竹
裏閑窓不見人
門前舊路生青草

橫山故居

家在雙峯蘭若邊一聲秋磬發孤煙山連極浦鳥飛盡
月上青林人未眠

題葉道士山房

水邊楊柳赤欄橋洞裏神仙碧玉簫近得麻姑書信否
潯陽江上不通潮

山中

野人愛向山中宿況在葛洪丹井西庭前有個長松樹
夜半子規來上啼

王郎中席歌妓

柳拂青樓花滿衣能歌宛轉世應稀
空中幾處聞清響欲繞行雲不遣飛

竹枝詞

帝子蒼梧不復歸洞庭葉下楚雲飛
巴人夜唱竹枝後腸斷曉猿聲漸稀

山僧蘭若

絕頂茅庵老此生寒雲孤木伴經行
世人那得知幽徑

遙向青峯禮磬聲

送柳宜城葬

鳴笳已逐春風咽
疋馬猶依舊路嘶
遙望柳家門下樹
恐聞黃鳥向人啼

瑯琊寺

東晉王家住此溪
南山樹色隔窻低
碑沉字滅昔人遠
谷鳥猶向寒花啼

贈朱放

野客歸時無四隣
黠婁別久案常貧
漁樵舊路不堪入
何處空山猶有人

短歌行

何處春風吹曉幕
江南淥水通朱閣
美人二八顏如花
泣向春風畏花落

代佳人贈別

見紀事

萬里行人欲渡溪
千行珠淚滴為泥
已成殘夢隨君去
猶有驚烏半夜啼

宮詞

玉樓天半起笙歌
風送宮嬪笑語和
月殿影開聞夜漏
水晶簾捲近秋河

其二

金吾持戟護新簷
天樂聲傳萬姓瞻
樓上美人相倚看
紅粧透出水精簾

桃花曲

魏帝宮人舞鳳樓
隋家天子泛龍舟
君王夜醉春眠晏

不覺桃花逐水流

酬柳相公

天下如今已太平相公何事喚狂生箇中恰似一作此身還似
籠中鳥東望滄洲叫數聲

送李侍郎從宣城取洞庭路往吳興

世間唯有情難說今夜應無不醉人若向洞庭山下過
暗知澆漑聖姑神

攝山聽子規

棲霞山中子規鳥口中血出啼不了山僧後夜初入定
聞似不聞山月曉

子規

杜宇冤亡積有時年年啼血動人悲若教恨魄皆能化
何樹何山着子規

悼稚

稚子比來騎竹馬猶疑只在屋東西莫言道者無悲事
曾聽巴猿向月啼

海鷗詠

萬里飛來為客鳥，曾蒙丹鳳借枝柯。一朝鳳去梧桐死，

滿目鴟夷奈爾何。

通翁得李鄴侯服氣之法，侯亦待以殊禮。及侯卒，作海鷗詠以寄懷。大為

權貴所嫉。


送李秀才入京

五湖秋葉滿行船，八月靈槎欲上天。君入長安予適越，

獨登秦望望秦川。

悲老宮人

白髮宮娃不解悲滿頭猶插麗花枝曾緣玉貌君王寵
準擬人看似舊時



華陽集卷中

欽定四庫全書

集部

華陽集

卷下
子非熊詩附

詳校官太常寺少卿臣陳桂森

檢討臣何思鈞覆勘

覆校官中書臣王慶長

校對官中書臣孫球

謄錄監生臣余嘉穎

欽定四庫全書

華陽集卷下

唐 顧况 撰

文類

進高祖受命造唐賦表

臣况言臣聞上古滅跡以恢至道其次立名以扶大化
臣山谷之人頃為韓滉叅謀滉性嫉惡臣性孤直滉先
朝露臣復故山陛下拔臣臣况口噤汗出不敢論天下
事然自開元天寶以來耳目所接精經茂德畧有百人

不霑一命非不欲出無益所以不出豈大國無人而黨
與之徒未詳菽麥驟居清貴此由權臣上負明主下負
蒼生中過賢路耳是非邪正勢不兩立唐有天下賦斂
甚薄刑罰甚寬神人保和鳥獸咸若然而時有反側逋
逃之誅得無因乎惟天啟聖無有一物不得其所書曰
遠人不服來以文德德猶土也廣厚載物文猶火也光
明麗天剋金之象生土之義蓋聞朝出羣龍多士如海
出夜光明月所以別好惡而扇華夷未有影不從表聲

不從聽聖德惟新頌聲不作臣下之闕也謹進高祖受
命造唐賦一篇論皇家大慶歷祚延久恍若光靈促臣
上獻伏惟陛下赫赫巍巍與天同功鳳凰巢于阿閣麒
麟乳于郊藪臣之願也無任冰谷之怖謹奉表以聞臣
況誠惶頓首頓首謹言

如意輪畫銘

并序

金剛記寶頂記花三昧頂輪三昧等經云蘇迷盧南有
俱露州州西南面夷羅國俱尸那城南去八千由旬至

于雪山茲山純白厥草肥膩高六十由旬周二千二百
拔提河在左長仙園在右清熱惱海在南跋陀海在北
善法堂在上瞽龍洞在下日月迴泊在俱物羅奢半空
脇是龍居此洞地堅牢恒沙諸佛成道諸所如意輪於
此山間佛言毘勒那鉢奢無忘無心是離那奢多性本
空是祇彌物都思觀身實相是悉那鉢多彌觀佛亦然
是又問何者是陀羅尼相貌佛言空觀心無為心廣大
心常住心不變異心無無心無無心是恒沙諸佛諸佛

摩頂密語也言在身中恐人輕教諸佛不許內外雙立
非賢不轉如意輪本名少足少法也其法滿足謂之少
足與天圓滿願廣大慈悲等慈慈觀智綱寶手千手
眼得無畏清淨光除業道破諸暗無障礙無等等與夫
普明慈明千光王佛十億之號猶為至畧淨華宿王智
佛時所立名記普門願行此應見聞隨方說法法同而
名異固云賢劫中千佛助化此為一佛二尊不並願為
侍者寶德佛時名安忍童子請願之後名如意輪大悲

菩薩是愚於陰界畫彼真形法華經云一華獻畫像漸見無量佛銘曰

同體如來所說總持法內外雙見為普門大悲廣運無邊際已渡塵沙生滅海圓滿滿足各如意破除業暗發光彩

大尉晉國公韓滉謚議

議曰韓滉天然風操自建名實馭下威重允凝績用頃天下兵興務給財食月計億費王府一空中歲滉領小

司徒實專出納平準齒革之材質遷虞衡之賦邱無斂
貨市均靡物加以晉用殆復充盈洎擁旄吳楚封畧數
千里盛名大烈望而斯畏嚴令山鎮不可輕沮諭意維
揚則張瑗之謀戢矣飛書斬將則沈清之亂平矣采衛
邦伯文武陪寮怙勢之徒負阻之族莫不軋軋顛顛如
也且天寶以來江左無物產資贍文法浸寬貪夫狗財
小人趨利求茲官者十恒八九滉柅能制動絲克理焚
過之所至刑必糾之非簡能之不知方矯時而為理興

元初姦宄偷變震驚我師滉首獻方物奔貢漢中慶賜
遂行邦用由濟貞元初歲不有秋秦將歛食上憂之用
人心大搖滉發廩救災不俟終日萬鍾繼至三輔斯給
昔蕭何轉漕關中寇恂資用河內皆以勤王幹蠱推功
第一若敵而言則滉之功非細矣爰命作相咨以財計
用統九賦漢粟誠多超古之才高謝主臣而已會登用
日淺其道未光然累行疇庸可得而擬謚法曰慮國忘
家曰忠安君不念己危曰忠滉安國荒饉濟君艱難屬

時多虞立權修賦危已從怨忘家在公得非忠乎謚法
曰剛德克就曰肅執心決斷曰肅滉剛而得位師克以
貞令出惟行刑其必犯得非肅乎臣聞舉善不必求備
易名是其大者昔謝琰定謚特以忠肅褒榮何曾議謚
詔以忠肅追美稽滉勲勞無忝前烈伏請謚曰忠肅謹
議

文論

周語之畧曰孝敬忠信仁義智勇教惠讓皆文也天有

六氣地有五行此十一者經緯天地叶和神人名之為文其實行也文顧行行顧文文行相顧謂之君子之文為龍為光上古云言之無文行之不遠堯之為君聰明文思文王既没文不在茲乎文王之代草木鳥獸皆樂文王之治曰靈沼文王之臺曰靈臺虞芮不識文王入文王里所見耕者讓畔行者讓路班白不提挈自相謂曰吾黨之小子不可治於君子之庭詩人美之云文王斷虞芮之訟晉文與楚子戰而霸謚曰文公夫以伏羲

之文造書契黃帝之文垂衣裳重華之文除四凶舉八
元周公之文布法于象魏夫子之文木鐸狗路此其所
以理文也伊尹之文放太甲霍光之文廢昌邑呂尚之
文殺華士穰苴之文斬莊賈毛遂之文定楚從藺相如
之文奪趙璧西門豹之文引漳水沉女巫建安正始洛
下鄴中吟咏風月此其所以亂文也夫以文求士十致
八九理亂由之君臣則之堯舜禹湯有文桀紂幽厲無
文太顛闕天有文飛廉惡來無文昔霍去病治第曰匈

奴未滅無以家為於國如此不得謂之無文范蔚宗著後漢書其妻不勝珠翠其母唯薪樵一厨於家如此不得謂之有文且夫日月麗於天草木麗於地風雅亦麗於是故不可廢廢文則廢天莫可法也廢天則廢地莫可理也廢地則廢人莫可象也郁郁乎文哉法天理地象人者也周易贊乾曰大哉乾元萬物資始贊坤曰至哉坤元萬物資生唯大者配乾至者配坤幽者隳鬼神明者隳禮樂不失於正謂之文

陰陽不測之謂神論

黃帝建立甲子考定星歷於是有天地神人之官少昊
既衰神人雜擾顓頊命羲和以司之天地三苗九黎不
復亂逆周室既壞君不告朔漢道隆興方定餘閏世時
昭昧君平季主張衡索統陳訓韓友卜翊京房管輅郭
璞干寶京房班固云陰陽多拘忌以為無益嗟乎古論
陰陽以和神人以順風雨以播稼穡以除災害後之學
者但張恢譎不自戒慎不顧親疎之道不精逆順之理

不達性命之分而裁衣拜官沐浴剪爪徵於歷日豈不悖哉左道亂正先王無赦往見術者序卜筮之書及諸家秘訣七曜九宮六壬三五復返十精飛鳥天目地耳計神漢歷以天赦母倉為吉祥歷以雲漢密莫為吉各生異義天竺歷法復與大衍有差吾誰歸矣又以姓配音以音配墓以墓配殺此莊惠以荒唐舛駁之論且黃帝二十五子其得姓者十四人或以地為姓或以官為姓或以謚為姓或以王父字為姓士會在虞為陶唐氏

在夏為御龍氏在商為豕韋氏在周為唐杜在晉為范
宣子在隋為隋武子在秦為劉氏女嫁藥廩為析氏焉
此一人之身改姓三改氏五范蠡在陶為朱公在齊為
鴟夷子范雎稱張祿先生第五倫本田齊鮑永本姓包
京房本姓李張良之後為留氏田橫之後為王氏姓有
兩字三字四字五字孰先孰後孰是孰非長平同坑南
陽同封時日或同吉凶或異行年本命其事安在周時
玉尺漢代黃鍾河汾鼎氣沉埋日久不推測則其道多

門行則無盡不如已也是故文字非上學上學神聽原其性也集解非宗師宗師受授扶於理也端心靜一神明將至黃帝遺玄珠罔象得之漢主心動獲貫高襄子心動得豫讓披髮祭野野人之遺魂非有陰陽筭術之功涉津無涯安濟所屆釋氏五陰輪為四生或居人中以為鬼神唯代有佛法獨能究竟白雲依山出入自得飛與鳥滅虛空不礙清明在躬志氣如神陰陽不測唯佛而已

戴氏廣異記序

予欲觀天人之際變化之兆吉凶之源聖有不知神有不測其有干元氣汨五行聖人所以示恠力亂神禮樂刑政著明聖道以糾之故許氏之說天文垂象蓋以示人也古文示字如今文不字儒有不本其意云子不語此大破格言非觀象設教之本也大鈞播氣不滯一方檮杌為黃能彭生為大豕萇宏為碧舒女為泉牛哀為虎黃母為黿一作鱉君子為猿鶴小人為沙蟲武都婦人

化為男成都男子化為女周娥殉墓十載却活羸謀暴
市六日而蘇蜀帝之魂曰杜鵑炎帝之女曰精衛洪荒
窈窕莫可紀極古者青鳥之相冢墓白澤之窮神姦舜
之命夔以和神湯之問革以語恠音聞魯壁形鏤夏鼎
玉牒石記五圖九籥說者紛然故漢文帝召賈誼問鬼
神之事夜半前席志恠之士劉子政之列仙葛稚川之
神仙王子年之拾遺東方朔之神異張茂先之博物郭
子潢之洞冥顏黃門之稽聖侯君素之旌異其中神奧

顧君之真誥周氏之冥通而異苑搜神山海之經幽冥之錄襄陽之耆舊楚國之先賢風俗所通歲時所記吳興陽羨南越西京注引古今辭標準淮海裴松之盛弘之陸道瞻等諸家之說蔓延無窮國朝燕梁四公傳唐臨冥報記王度古鏡記孔慎言神恠志趙自勤定命錄至如李庾成張孝舉之徒互相傳說譙郡戴君孚幽蹟最深安道之胤若思之後邈為晉僕射達為吳隱士世濟文雅不隕其名至德初天下肇亂况始與同登一科君

自校書終饒州錄事叅軍時年五十七有文集二十卷
此書二十卷用紙一千幅蓋十餘萬言雖景命不融而
鏗鏘之韻固可以輔於神明矣二子鉞雍陳其先志泣
請父友況得而叙之

禮部員外郎陶氏集序

樂殷上帝上帝臨下俾夫文星驚動民心二南六義在
乎章句安樂哀思在乎影響君子入其國觀其樂知其
教制氏徒備乎鏗鏘此言之大傳稱不朽易曰尚詞唐

詞臣姓陶氏諱幹冀方思深之裔前漢青後漢謙東晉
侃至靖節貞白二先生生人表秀間朝育才方守省署
慶鍾于君開元十八年進士上第天寶文明載登宏詞
拔萃兩科累陟太常博士禮部員外喉舌密勿壇場破
的無發不中行在六經志在五言尤精賦序朝出暮編
殷如奮鐸聲塞海隅化諸溺音蔚公之容風山籟靜然
華實光于苑圃綦母著作潛王龍標昌齡則其勅敵登
公之門李膺之門也鮑馬二京兆中書謝舍人良弼良

輔侍御史李封殿中劉全誠名自公出名著公器神人所
所恠寧貴不名詳矣大抵文體十年一更有體病而才
瞻有言紆而事直有文勝而理乖雅艷殊致雲和之源
杳以無窮析為萬派嗣子問儒為法官捧先人之集霜
露之疾將愬于吾慕母通問之世友撫事編次咨於藝
訓稽於古實是有冠篇之述乎哉

信州刺史府君集序

上天文明以配我朝光照四海麗于百穀主父之臣如

太皞之於勾芒先甲之士也公姓劉氏名太真天寶中
與兄太沖登秀才之科蘭陵蕭茂挺目以丘門游夏官
踐御史左史尚書紫薇郎秘書監工刑部三侍郎時謂
得人翕然趨義恐在其後君既聳善心親人色與人行
加人言勝人在位者見君之如此物惡其上自然不容
君既施政春煦物雨濡物風動物惠歸物在位者又聞
君之如此主恩人望所未之替竟免其官亮彼徧人不
徵細故必獲他咎竊名之黨自此而堅然則是清響

不奮哮嗥有聲或以其言黷朝典賤子西嚮泣拜曰不然日月有蝕五星有孛故能成天之紀唐堯之時亦有讒豎故能成堯之大夫國有蠹如樹之有蝎不敢蔑焉役文之士懼禍之不暇朝夕虔惕苟無深疵不敢言瑕春秋暮矣溫溫生疾竟終餘水之上君門深而不得覲親舊邇而不得歸明主方覺而君已歿有文集五十卷遊名山而窺洞壑者畧舉竒峯紀勝境至於鬼恠不可紀焉臨終賦詩意不忘本凡古人所詠山水遊仙田家

之什脫蔚羅走思以自適其可得乎奄忽之辰以況從
表兄弟平生相愛手運遺札心存顧託冢子諷構厥德
不忘前好得而叙之

右拾遺吳郡朱君集序

因都國出鱗角鳳喙為續斷之膠與本無異朱君能以
煙霞風景補綴藻繡符於自然山深月清中有猿嘯復
如新安江水文魚彩石歷歷可數其杳復脩馳若有人
衣薜荔而隱女蘿立意皆新可創離聲樂友之什情思

最切雖有諫職心遊江湖謝病而來慕出塵之侶精好
涅槃維摩經愛人為善有志未就終於廣陵舟中識與
不識聆風嚮義相與興歎我主人延陵包君兵部李侍
郎禮部劉侍郎皆有託孤之舊子郁襲其先行敬事父
友泣捧遺文祈余冠序

監察御史儲公集序

聖人賢人皆鍾運而生述聖賢之意亦鍾運盛衰矣開
元十四年嚴黃門知考功以魯國儲公進士高第與崔

國輔員外綦母潛著作同時其明年擢第常建少府王
龍標昌齡此數人皆當時之秀而侍御聲價隱隱轡
諸子其文篇賦論凡七十卷雖無雲雷之會意氣相感
而扶危拯病綽有賢達之風拔身虜庭竟陷危邦士生
不融可以言命然窺其鴻黃窈窕之學金石管磬之聲
如登瑤臺而進玉府靈扃邃宇景物寥々映綠流翠草佳
木好鳥不足稱珍嗣息曰容木鳳毛駿骨恐墮先志泝
洄千里泣拜告余曰我先人與王右丞伯仲之歡也相

國縉雲嘗以序冠編次會縉雲之謫亡焉後輩據文之士風流不接故小子獲忝操簡伏恐魂遊無方嗤責造次茫茫古道不見來者豈以龍戰害乎鹿鳴齊竽競吹燕石爭寶嗚呼薄遊之士未躋一峯已伐其峻登閬風者乃知其迤邐昏明掩轄將盡復通之者其若是乎

送朱拾遺序

楚天暮秋衰草多霜我送朱兄置酒寒塘他方有遺名之人語出世之事昔我一作者成大師居毘耶離方丈之室

以虛空量納諸羣有為法而來難於酬對凡辯才者精
於語默雪山有草可生醍醐上賢不自豐故貧也上智
不任數故樂也言出以機在心為咎故慎也和平發中
金玉鏗鏘如秋水之溢塘殊不知長松倚空遠鶴孤唳
如一有朱字兄也將刀畫水水終不斷以道親人人何有別
何山不可以為家何水不可以泛舟我送朱兄浮于亂
流主明不在諫故一有諫字臣在瀾漫之遊

陪江西李大夫東湖賦詩送宣武軍趙判官還

使序

相國大司徒統戎於汴汴之介者有長鬣廣顙乘遽四方交驩諸侯以利軍實我大夫待以加等問其所欲蓋相國於其君義踈而後有誠誠存而後有別此敬相國而及于其告復乃賦平字之什以寵之春秋之義凡君子之嘉一善接一士皆欲有所用必相其宜而比之昔晉伐阿甄燕侵河上晏相之薦穰苴文能附衆武能威敵果却燕晉之師

送韋處士適東陽序

珠玉在淵蘭在深林士不定方而處東陽佳地樓上隱
侯之八詠溪中康樂之贈答韋生翱翔若復故都會予
放逐相逢姑蔑之山所裁新詩婉而有意凡遊山水苦
無卷軸復無幽人攜手一何異飛鳥一翼行車隻輪眼
界孤矣於疑作言自遣以貺處士乎哉

送張鳴謙適越序

晉司空十四代梁尚書左僕射纘武代孫曰鳴謙問行

於我對曰迺祖蹈道隱黃鵠山乃先敦德隱朝陽山
今子洽聞繼修先好是一門而三隱矣臺仲之處也雲
翔冥廓亦復何礙又將嫁於四方余嘗適越東至剡南
登天姥天姥而西即東陽太末姑蔑之地盤桓乎弋陽
其山霞錦其水紺碧其鳥好音其草芳葩奪人眼睛猶
未麗也仙人城在其上可以汰神可以建文可以棲子
獨不見錯誅而回樂乎感隙駟之末光事塗龜之修齡
觀萬化之始終道訓曰處其厚不處其薄丈夫之事予

亦從此逝矣適人之適孰與自適其適乎

江西觀察宴度支張侍御南林花亭序

右洞庭左彭蠡公所臨也先庚式戎後甲徵文公所總也夫以清淨和平之德下施於民猶之不理既當其樂不觀其華不在吐曜騰光自開自落而已欣戚之氣實棲其間繡衣使者詞客張君相閣之賢從事於公疆理一曰均賦二曰省徭三曰主文能中質茲亭之樂其可節乎蓋取之明離麗君子健應之象

宴韋庶子宅序

昔洛

文粹
作維

下鄴中蘭亭峴首文雅之盛風流之事蓋一

方耳今席有芳樽庭有嘉木飲酒賦詩皆大國聖朝羣
龍振鷺握蘭珮玉者也在古其有陋乎在今其有榮乎
終宴一夕寄懷千載是時也暮春駘蕩孟夏恢台之交

耳

文粹無
耳字

宋州刺史廳壁記

商邱之地辰火之宿孟諸之湄闕伯所遷微子所封之

國也厥貢絺紵厥篚織纊有蒙盧二門有睢渙二水炊
骨易子隕星退鷁仲尼之伐樹子罕之棄車左傳
地焉梁孝王時四方遊士鄒生枚叟相如之徒朝夕宴
處更唱迭和天寒水凍酒作詩滴是有文雅之臺清泠
之地鴈鷺之所棲集園苑三百餘里制度法於長安漢
末始署為睢陽郡皇家大臣房梁公嘗牧此州今相國
彭城劉公勛德有光亦典此郡前破李靈曜後破李希
烈為梁開路而東方諸侯并賦鹽泉所入歲約三千萬

緡商在其外明年西朝天子天子嘉之俾平水土乃拜
司空俾敷五教乃拜司徒入參大政出耀威武范陽君
以智畧佐之由御史中丞行軍司馬節度留後而領於
是邦幕府得人於斯為盛下車之日無土不植桑麥翳
野舟艫織川城高以堅士選以飽詩所謂誰謂宋遠誰
謂河廣者矣自貞觀以來列名氏者而房梁公為首存乎
東壁大厯之後繼聲躅者宜司徒公為首遂列于座右
也貞元五年四月十九日記

嘉興監記

正德利用阜財足食國之本也天寶末天下兵起乾元
初上司奏議宜以鹽鐵之職總以社稷之臣幹乎山海
之利以富人也淮海閩洛其監十焉嘉興為首朝廷以
是蠲貸恒賦實乎大內大臣奉法為事選人拔其賢幹
昇於憲署以宣原隰光華之寵趨其署者如好鳥之栖
茂林相國劉公嘗以大監小州不相若也故其職員不
忝乎爵秩其刀布必倍於租入渤海高君日倫世以勛

烈緩步闊視曾襟洞開中有方畧不修進級故一廷評
于茲二紀傾酒定交擲金市義不餌不仁之粟前使張
侍郎滂王尚書緯總其卜式弘羊之計遂有采山煮海
之役十年六監興課特優至是未暮從百萬至三百萬

監一作鹽人賈人各得其所故端介之節風彩自高繼夫

漕運波委陸溢此天下之利器也可示人乎夫以步光
莫耶切玉如泥荆鍾無聲不以一割均其銛鈍君子以
知人則哲無德不醇鴻飛九霄驥騁千里前秘書省著

作佐郎顧况美使臣之得人貞元十七年歲在辛巳正月朔記華陽山人顧况書

湖州刺史廳壁記

江表大郡吳興為一夏屬揚州秦屬會稽漢屬吳郡吳為吳興郡其野星紀其數具區其貢橘柚織縞茶紵其英靈所誕山澤所通舟車所會物土所產雄於楚越雖臨淄之富不若也其冠簪之盛漢晉以來敵天下三分之一其刺史沿革不同或稱太守或稱內史或稱都督

他州或否如魯史晉乘侯牧一也其鴻名大德在晉則
顧府君秘秘子衆陸玩陸納謝安謝萬王羲之坦之獻
之在宋則謝莊張永褚彥回在齊則王僧虔在梁則柳
惲張謖在陳則吳明徹在隋則李德林國朝則周擇從
令聞也顏魯公忠烈也表給事高謙正也劉員外全白
文翰也洎于頓大夫作塘貯水溉田三千頃今使君辭
唐景皇帝七代之孫先公尚書先公大夫奕葉之勲
有功於民公實嗣之孔悝銘鼎天下重器天王褒拔于

公襄陽節度李公陟當道觀察統諸道鹽鐵轉運二牧
既陟惟公盤桓鴻鵠不飛飛即摩漢其逋者復其危者
安其憂者泰所謂善緝於是拓郭耰萊就便除害政之
餘力作消暑樓於南端復亭署於白蘋洲聿興廢土光
明敞豁湧出谿谷其舊記吏部李侍郎紆撰其圖經竟
陵陸鴻漸撰使君命况總兩家之說倣落晉宋訖于我
唐凡一百九十七人及歷代良二千石儀形略也鋪張
屋壁設作存勸竦神告民春秋不朽之義也貞元十有

五年十二月哉生魄筆

王氏廣陵散記

衆樂琴之臣妾也廣陵散曲之師長也琅琊王淹兄女
未笄忽彈此曲不從地出不從天降如有宗師存焉曲
有日宮散月宮散歸雲引華嶽引意者虛寂之中有宰
察之神司其妙有以授王女於戲天地鄙恠而絕神明
侷儻而授中散沒而王女生一作傳其間寂寥五六百年
先王作樂殷薦上帝有不得而聞者鼓鐘時動敢告於

太師

華亭縣令延陵包公壁記

陶氏之隱誥云張李二君勤行仁義異代同德

一作祖

慶

鍾包君鮑靚通靈之士秦有包邱漢有包咸世為學官
隨晉南渡今為延陵人也隋書儒林傳包愷包愉兄弟
皆治漢書從子弟千餘人樹碑記德惟皇六葉鴻臚宣
力於王室著作垂名於當代起居祭酒聲隱都野與翰

林供奉晁析其流派君辟

一作郡非

秀才以文字自潰

一作附

嘗夢入冥府決時而蘇根於修短有開之兆言地下之法峻於人間頗符干寶搜神之事隨難奉天重圍暗解上撫其背而春官亦以賓禮待之及為華亭有闢田增戶均賦愛人之政語曰千室之邑百乘之家由也可使治其賦而君實有之舊章壁記記其官叙野史之流也平原之谷水崑山鱸魚蓴菜海錯陸產彼何人而不知今記其異庶有補于化耳

宛陵公署記

博陵崔公端憲臺出九江涉吳換號三牧作又仁聲上

騰上褒之以宣歙等州團練觀察採石軍使內棲

一作建

茂行外傳純德德鋪生人人受賜所部無事緝乎井
室高棟大廡樓傳高亭畧以崇牙虔君命也畧五千架
巧漫赭堊燭乎一川竹釘木屑皆適所用前鎮未之有
也其辟一士一作生未嘗不當其任其裁一簡未嘗不以
憂人為心兵馬使南陽張伯陽承公指揮應接不暇廣
而不費華而中儉堡有嚴柝封有巨防巢洞之寇化為

平民銅宮

一作官是

戰馬牛渚姑熟之隘籠波絡谷莫不帖

焉夫宣戶五十萬一戶二丁不待募於旁郡而宣男之半已五十萬矣蹠勁弩耀雄戟吞敵如脯我心不啓其或有啓我心備銳而襲之淮海之援過賓之寵亦所以補凡例也庚辰年正月下旬日前秘書著作郎顧況記

蘇州乾元寺碑

五蘊十二入十八界此上三科能包萬法因緣生為有無自性為空有融一則中道義雖石船渡海蛟背負山

不為希有事僧法珣與和合衆法藏等造乾元寺者晉
高士戴逵子顥之宅也乾元初節度使鄭昊之奏立觀
察使李涵李道昌皆有力大臣求無上道以心無所願
無邊受者實得施者實與雖空不敢有為有滅無為無
滅無為有為之體有為無為之用無生無滅無相無名
無相法無言語說法以無言語說故有相大乘有觀法
門無相大乘無觀法門於有所得有相大乘義於法無
所得無相大乘義所得無所得俱真一乘之義事也為

妙因果譬如種子依地而生又如天地能荷羣有虛空之體大於天地天地有盡虛空無盡如來之體大於虛空光明虛覺圓寂萬德故於無住本建乎諸法不動真際恒沙煩惱莫不斷除魚吞鈎虎落穿蛾拂火此衆生自取其毒道本平坦樹本清涼佛在摩竭提國城等正覺諸弟子栖乎茂林藉彼祥草厥後因時設教猶著弊衣行次乞食及往忉利省摩耶夫人優填王鑄金刻木始用膠漆泥布佛有像自此始也與佛在時功德無異

於是給孤長者造祇洹精舍末由底迦造龍宮精舍竺
乾法蘭造洛陽白舍寺佛圖澄造鄴中九百七十三寺
釋道安造襄陽一十五寺遠法師造廬山東林西林寺
度法師造攝山栖霞寺杯度法師造南陵隱靜寺傳大
士造東陽雙林寺思大師造衡陽南岳寺智者大師造
天台國清玉泉寺三十五寺畧也涅槃無前無後無般
若無新舊法珣上不重舊德下不輕新學門人清瑛清
况於經藏中抄佛心訖永示無極文曰倬哉毘盧宏巨

大千百億日月藕絲貫穿蛟背負文飛登梵天塵勞為
海般若為船截生死流是曰希有大哉乾元寶則不朽
和衆雲臻珣為稱首佛告善來寶坊崇哉法雨洒埃慈
雲徘徊

廣陵白沙大雲寺碑

地輪依水水輪依火火輪依風風輪依虛空虛空無所
依佛體也變佛體為金色界地輪是也金色界中有香
水海水輪是也香水海水中光明蔽火輪是也復有

寶林香花瀰漫周遍佛土風輪是也上至香積下至金色一光明藏依報正報之因歟有智為精界無智為器界佛土為性界法身報身應變之身一也天親以應化非真佛亦非說法者其華嚴則不然諸佛同身流入毘盧遮那智藏之海人有血脉地有溪澗滄島之脅有白沙之墟焉天塹在南蜀岡在北敦彼廣斥勾壤五林檮刺元精猛虎蹲路騰蛇跛水氣毋毒形火爐胚物之意總持相土曰牛欄河灘畔堪造漫吒羅非人乃秩天寶

末長安僧約避虜東土畫為像宮以配梵帝皇猷允塞
景福爰集善來若干商主若干與其眷屬爭欲奮迅爰
雲構版鍤定中丕赫微約之功人其捨諸於戲古稅其
簿人猶告困夫約不柄刑賞不驅其人蓋以天子孝理
昭明並受其佑霜露怵惕蓼莪罔極申以上報謏儒經
之闕聞此名教君子肝腦而塗地者也不然其孰能與
於此乎所作既成推山斡坎金翹吞龍之勢徹乎上天
磅礴乎夜摩曾開掌坦綦布箭直廓乎其崇也哉洎夫

攝師陶師事訖朝夕方等百一嚴身之具華儉適中滿而不缺三草二木俱霑一雨昔北山之翁天帝命操蛇之神以遂其志是知慈善根力軍吒胃索口唵火比皆瞽電春雷張曜威恒保寧刹土易見底迦一時生悔魔軍法將不可以較乎勝負吹鑼擊鼓歌呗讚歎旋和之衆莫不圓通信乎罰臆停酸修羅竄迹菩薩鏡生死海為大涅槃大法現前了無塵障凡有作有證名有相大乘無作無證名無相大乘體相融一真味也涉入無闕因

中說果果中說因此文殊道引之智殺羊有角能破金
剛不破如如之相我於觀照權實皆如如從心上變起
離心無物離物無心因物因迷盧不動有若靈辨禪師
者大照大師之上照足如優曇花綱首良制利見如蒼
蔔花絢上人者根器清淨如拘物頭花芬多利花聿來
求我分別三諦不有歐和之志悉地之德焉難乎決擇
然則嗚陔喃散施有情之義磁石攝鐵不攝鴻毛相應
故作針則沉作鉢則浮隨緣故獸齧堅骨魚食碎砂

骨游舍託胎弗也明佛性故與夫有不染塵空不斷相
非空有故若有去來若無去來無去來故若有方所若
無方所無方所故佛與衆生數無增減無增減故補得
迦羅由來則佛前佛後同名同號乃至不同一一微塵
之數微塵數佛各坐蓮臺展臂指塵皆當此說且修多
羅藏八萬在娑竭羅龍王宮中以龍樹之聰利受持不
盡海惠盡焉曾不得夫少分或以其言河漢詎知我生
一一生陰陽也不測之外更有神速之如此乎是以聖

人神道設教大哉神乎若在其上若在其下羣玉蔽書
之府比夫現量春秋叙二百餘年方彼曠劫百千萬億
那由他其數畧也法從數起從一剎那至一洛刹從一
洛刹至一俱胝從一俱胝至一僧祇從一僧祇至一高
出從一高出至不可轉無邊無碍無央無極重重成住
壞空空不相凌滅其相去也不亦遼乎假使生肇融睿
伊臯稷契共佐唐虞我知不相若也老聃曰竺乾國有
古先生西過流沙尋師之旨孔子對商太宰曰三五非

聖西方之人蕩蕩焉無得而稱又曰聖人丘不得而見之矣日月無燭無不燭聖人無見無不見般若無知而無不知周紀有之昭王二十四年甲寅地震動江河泛溢王問大史蘇由此何祥也對曰聖人生於西方穆王三十三年壬申地震動江河泛溢王問大史扈多此何祥也對曰聖人滅於西方示有生滅實無生滅向使無生之法格乎戰國戰國得之秦不坑儒趙不坑卒小國事大國大國不征小國會哺鼓腹無為之法化也

雖有大夢然後大覺塵勞性空空有常寂分改遷易無
非法身而大雄法寶五迦葉不得當乎付囑必也當乎
不論前後此瞿曇所以贊佛法也文曰

佛日之曙兮照乎東方大雄設法兮海印發光獨立世
界兮橫吞八荒江沙漫漫兮寺壓其陽撼谷幹波兮氣
盤中央

衢州開元觀碑

玉太上也謂之三清淵神靈也謂之三洞洞之法金璫

玉珮之書玉馬之券迴車畢道天誥也負石填河師誓
也得之者上騰九天失之者下釁十祖故曰萬劫秘而
五千文行蕭武好佛法道士挑攪釋藏徒聊順帝旨強
說為大教佛經故論者短之多稱道家唯有老子兩卷
井蛙不知尾閭也大哉玉皇上極金闕青童紫微扶桑
之君仲侯左靈東華之君人雖位在上清而猶臣妾玉
皇太上已下如陪臣焉凡三十六天三十六洞地道下
通華陽林屋傍通龍邱九巖其土神秀厥生道奧徐先

生名含真中書侍郎安貞之族子也傳八景之真文握
九光之靈符隸乎此觀初棟宇壇墀惟彼瓦礫鬱為草
莽先生之功林堂象設始吐光彩蕭寥同映養屯茹氣
蹈火吞刀之士不可呼而來夫道可不遇文復何言銘

曰

天地未生聖人未作陰陽塊垓日月磅礴道隱乎先氣
流形博乃播羣法靈神沃若奔景無天迴元豁落帝作
玉府以般靈居四輔之目三清之書不得其人曠劫秘

諸臣拜稽顙以度寶魄之明浩與

况往嘗盜開靈書罰露天誥免冠自懲慮不塞咎戾矢
其文以自贖蓋欲鋪簡神明非為道士所發自貞元辛
未歲九月哉生明于窮愁幽憤思以自適吟詠道篇以
攄煩襟時長安尉杜陵史鏞在焉為余搦管揮洒後漢
神仙之士王次仲者善為此書余今日見史侯如漢世
矣

虎邱西寺經藏碑

闔廬之葵海湧也水銀為溟渤黃金為鳧雁精氣為白
虎是名虎邱東晉王珉捨山造寺生公忍死待西
國經來之所也山中塔廟叔父有功叔諱七覺字惟舊
容相端靜神寵初八歲剃度萬言一覽際天人嘗以唵
啞林萬法之母法從數起乃讀外書小餘大餘以為證
據維摩所謂通達善道法華所謂通達大智况受經於
叔父根鈍智短曾不得乎少分至德三年示終本山付
囑門人澹交曰此山法事莫不圓對而經藏猶闕澹交

僧瑤俗姓何廬江次宗其胄奉佛不敢廢師之命自至
德貞元龍在戊寅紹建方畢瞿曇教迹不捨有表不住
無表般若用中壇攝其六頂攝其四譬如無根安得有
華故覺華長者得定光如來授記鹿仙長者得釋迦如
來授記寶手菩薩得空王如來授記皆因造葺而得作
佛從虛空葺流出一切葺一切葺流出四大葺四大葺
一億大葺四億小葺圍繞湧出狀如蓮花灌於四葺流
出十二葺從十二葺分為三葺一聲聞葺二菩薩葺三

真如性海。藏海水可量。虛空不可量。虛空可量。菩薩摩訶薩。成就衆生。變化隨感。不可量。菩薩摩訶薩。修行地位。有分劑。故可量。諸佛真如性海。無分劑。故不可量。攘於三藏。流出八萬四千藏。修多羅藏。摩訶藏。為上首。於是。有法藏。寶藏。甚深微密藏。妙花光雲等藏。無盡在色。究竟天衆生。衆生福薄。不得瞻睹。謨呼羅摩海。醯首羅。大自在。神天樹雲音日輪。速疾執金剛。神淨光光香雲。最上光嚴身。衆神清淨華髻。梅檀樹光足行神雷。

音幢相雨花妙眼道場神淨花普照無等光燄主空神
永斷迷惑普遊淨空主方神示現宮殿樂勝莊嚴主晝
神普得靜光諸根嘗喜平等護音寂靜海音主夜神其
摩竭提國有金剛藏中有摩尼瑤王變現自在兩無盡
瑤嚴好花是諸菩薩演說如來廣大境界慈目瑤髻發
生喜樂可愛樂正念天王十方海中一切瑤王吐雲彌
覆流出教綱其佛號法水覺空如來嚴持器仗夜叉王
力懷高山夜叉王毘樓博叉燄口海光龍王等甚可怖

畏鳩槃荼王美目端嚴鳩槃荼王日光天子月光天子
星宿王天子威德光明天子各恒沙恒沙眷屬相與
掌護其南海楞迦山下娑竭羅龍宮其光明藏大地劫
淨諸方等諸經納於龍宮其善部州大藏六萬卷中六
千卷小藏四千卷大悲地有空有不空廣畧平等譬如
萬法出一塵中千輪百疏又於一塵流出如帝釋宮殿
因陀羅網一珠映八十億珠法界義中法身法性百佛
世界細一毛端析一毛端成微塵數世界一一世界法

身演無量百千萬億諸佛法藏是身為陀羅尼藏湧法
海藏衆法瑤藏舍乘敷藏花頂衆藏密耶護藏言頓顯
藏此皆奢摩他毘鉢舍那定惠之力觀見如來等藏藏
依識攝有舍藏理發於心而形於藏內外俱朗不其然
乎斯文淳一非敢戲論光佛相好贊佛功德從佛知見
中來頌曰雪山紺宮等虛宮耶叔父付囑澹交續耶妙
華光雲香普薰耶娑竭所措摩醯護耶喝刺呼噓歸命
護耶

檢校尚書左僕射同中書門下平章事上柱國

晉國公贈太傅韓公行狀

曾祖符皇朝潭陽郡太守祖智皇朝河南府士曹參軍
贈吏部郎中父休皇朝銀青光祿大夫太子少保贈司

空

韓洵混弟少保贈司徒二唐書
作行一太子少師贈太子太師

謚文忠公京兆府萬

年縣洪固鄉胄貴里韓混年六十五公繼代生賢左右

王室鄭武之賢韋平之美

開元中

解褐授右威衛騎曹參

軍丁文忠憂服闋授京兆府同官縣主簿又丁內憂孝

貫神明外除授太子通事舍人肅宗在靈武授監察御
史兼北海郡司馬充北海節度判官道阻未行除通州
刺史尋充山南西道採訪使判官時宰醜正除彭王府
諮議詔授除殿中侍御史累遷祠部考功吏部三員外
郎判南曹尋遷吏部郎中給事中兵部選事有盜殺富
平令倚偽禁兵特詔釋之密疏聞狀遂伏其罪遷尚書
左承知吏部選事有擁馬陳詞造堦抗議曾不再煩主
吏重閱簿書片言遣之莫不心服拜戶部侍郎判度支

管諸道青苗稅戶屬國計空耗上難其人服勤九年出利百倍左藏之錢至七百萬貫太倉之粟至數百萬斛其邊儲或五六萬或十餘萬有附大臣間於先帝者引劉向羊頭山黍云權量久差公曰山之南北地之肥瘠禾黍不同會內藏有隋朝銅斛果不差異安邑解二縣鹽池比歲水漲甚於往年有漫生紅鹽之瑞詔諫議大夫檢覆并致祭祠宇號寶應靈慶池宣付史館拜太常卿出為晉州刺史拜蘇州刺史充浙江東西都團練觀

察處置使尋加銀青光祿大夫改檢禮部尚書兼御史大夫潤州刺史鎮海軍節度使依前充浙江東西觀察使令行風動無敢犯者自信安洪光東陽捍狼士僧惟曉等結連數部熒惑愚甿破其巢窟伏我自殪山越一清管郡十五戶百萬里尹亭長書佐小史令丞牧守通數萬人自公區處不朽之作乘輿播越畿甸路斷公日遣一使問道齋帛表詣行在諸道未知行在營將士無不引還惟公所遣兵鎮河南衝要堅守不退兵馬使董

晏將三千人鎮徐州部將沈清等頗違軍禁公遣一介
齎牒轅門答晏二十沈清等六十八人悉按軍令徐方
既定轉檢校吏部尚書加紫光祿大夫封昌黎公改
封南陽天子幸梁川巴山道命判官何士幹領健步七
百負綾縠練十萬疋上獻天子六軍從官扈蹕千里時
屬維夏未頒春衣表至行在衆情大悅公又命從事裴
樞李倫徵巡內兵甲麾下將士合三萬人請翊衛鑿輿
收復京邑上深嘉歎特加檢校尚書右僕射李希烈衆

軍東下志吞淮濟公即日遣兵馬使王栖霞李長榮栢良器以勁卒萬人泝流千里倍程救援纔及睢陽賊已陷襄邑攻寧陵栖霞等突圍乘城矢中元惡兇徒懾遁不敢東顧淮南初喪節度使大將王侁帶甲數千夜犯城府或出權計者云江南兵至侁兵遂散殺戮甚多士卒驕矜爭邀厚賞率居人商旅五十萬緡符牒已行人情恟恟公即日遣都虞侯李栖霞華謂兵馬使張瑗等曰收復上都六軍未賞節使薨歿豈名為功賦斂擅興何

人造意諸將引過橫調立停及大駕還都進封郡公時
希烈盡銳攻陳州公命諸將與宣武軍合勢破賊數萬
人關中初復公以為國無年儲何禦荒險陳圍已解汴
路即通抗表請獻軍糧二十萬斛從本道直至渭橋公
命判官元友直草創運務部勒趨程時河中阻兵堅城
未拔關河蝗旱軍食不足船至垣曲王師大振拜檢校
尚書左一作僕射同中書門下平章事加本道度支營
田充江淮轉運等使連歲蝗災仰在轉運公自晨及暮

立於江臯發四十七萬斛舳艫所至近遠慰安貞元元年十一月十一日制曰江淮轉運使某官某勵精勤職夙夜在公厥有成績可進封國公初封鄭改封晉前後河南用兵解寧陵睢陽之圍全彭城要害之地朝廷議勲特賜一子六品正員官又其軍鎮營宇舟船鞍馬甲仗旗鼓羽革丹漆牛羊六畜難乎校筭應緣兩稅唯有一榜人爭及限吏不到門今江南縑帛勝於樵采二年冬十一月朝覲上深禮重委以大計加度支諸道鹽鐵

轉運等使待空巖穴方歸田里主恩彌深初闕遂違顧
謂其族為當漑肝膽身塗草莽上答乾坤時屬西北用
兵倉庫空竭公和糴五十萬斛無敢奪期米價遂賤防
秋士馬儲糗更無闕自公當漕運初年四十七萬二年
七十萬末年一百萬尚結贊者使六蕃抗言逆順之理
夷虜感動肝膽楚越張權者不敢惕息盜位者退而思
過貞元三年二月二十五日薨於昌化里私第春秋六
十五皇帝震悼輟朝三日制曰故某官某應運而生弼

諧于我道符兩曜德冠八元以武綏邊以文經國方期

難老

一作續光

式作

一作茂

宗臣孰謂不融盡瘁而歿雖鄭亡

子產衛失柳莊惜悼之懷豈過於此過時謂

三字疑

撫床

憎慟當辰興嗟厚申往祔之恩載榮優贈之禮可贈太

傅前後賻贈布一千疋米粟五百石錢四百萬喪事供

官踐歷四朝歲逾五紀炎不執扇晝不伏枕疾無杖履

居心矜莊自同官主簿制一裘褐直為宰相古人無食

粟之馬衣帛之妾更爽之居不足多矣以沙門一行得

聖人之道特寫形仰影如宗師癖在春秋精於繫象賦
春秋七章著通例六卷并章奏詞畧十餘萬言豁如恒
星敦故舊重然諾好古博雅能書善畫天議大勲者則
不書小善舉大德者則畧其細事故不殫論矣公有子
弟聞斯行諸不敢墜失况以賓客從事日久泣慕清塵
謹狀

貞元三年閏五月十八日故金紫光祿大夫檢校尚書
左僕射同中書門下平章事晉國公韓公故吏將仕郎

前大理寺司直顧況謹上尚書考功伏以柱石元臣勲績光茂孝則先意承志忠則知無不為武能禁暴文以經國翊贊聖明懋建和平沃心造膝簡乎帝上策橫魏作宏規振乎外奄從流運恩軫睿慈今日若馳松楸將樹易名之典請舉舊章謹上

饒州刺史趙郡李府君墓誌銘

粵考春秋叙事之實趙郡東祖源流甚長衛州刺史嘉祚曾孫榮州刺史璿孫贈尚書郎銛子諱端字公表官

由臺省興元少尹少府監出泉饒二州刺史叅佐不書
畧也貞元八年秋七月終於郡署年六十一明年八月
庚申窆于鳳山之東原嗚呼神明無質君子能通其意
以為教本仲尼闡教微言七十子揚大義去聖雖遠其
七十子之季孟乎至於饒禮將驅俗經以道俗饒之人
始有講睦之聲上圓不帛織疑作織我渠喆昔桐鄉嗇夫
猶葬桐鄉桐鄉之人皆祠之今饒之葬如此嗚呼列童
載云精神天之久骸骨地之久此言骸骨滅其精神不

滅者何從心上變起而生展促常讀衆聖之書上於輝
典如川及海之無翻流蘧蘆疑作爐久處奮迅泥滓宜諸
精爽黜陟幽明亦由是也夫人贊皇郡清河崔氏從其
子拭盡力哀敬記石陵谷永質天壤銘曰

蘭桂有叢以薰其風邯鄲舊氏厥祖惟東吁嗟府君其
命不融精神本天不在乎地舊國飛魂新塋掩隧逝不
可止哀何不既

華陽集卷下

欽定四庫全書

華陽集子非熊詩附

送僧歸洞庭

江山萬萬重歸去指何峯未入連雲寺先齋越浪鍾
島香迴棧栢秋陰出庵松若救吳人病須降震澤龍

贈覺真上人

長安車馬地此院閉松聲新罷九天講舊曾諸岳行能
詩因作偈好客豈關名約我中秋夜同來看月明

寄太白無能禪師

太白山中寺師居最上方
獵人偷佛火櫟鼠戲禪床
定久衣塵積行稀徑草長
有誰來問法林杪過殘陽

經河中

一望蒲城路關河氣象雄
樓臺山色裏楊柳水聲中
思起懷吳客行斜向磧鴻
我來尋古跡唯見舜祠遺

一作風

送張主簿

松憲久是滄霞客
山縣新為主印官
混俗故來分利祿

不須長作異人看

姚巖寺路懷友

路向姚巖寺多行洞壑間
鶴聲連塢靜溪色帶村閑
疎葉秋前渚斜陽雨外山
憐君不得見詩思最相關

送杭州姚員外

浙江江上郡楊柳到時春
塹起背城鴈帆分向海人
嶠雲侵寺吐汀月隔樓新
靜裡更何事還應詠白蘋

送朴處士歸新羅

少年離本國今去已成翁客夢孤舟裡鄉山積水東
黿沉崩巨岸龍鬪出遙空學得中華語將歸誰與同

送馬戴入華山

古木亂重重行人識去蹤斜陽收萬壑圓月上三峯
雲裏泉縈石牕間鳥下松唯應採藥客時向此相逢

送喻鳧春歸江南

去年登第客今日早春歸鶯影離秦馬蓮香入楚衣
里間爭慶賀親戚盡光輝唯我門前渚苔應滿釣磯

送友人及第歸蘇州

見君先得意希我命還通不道才堪並多緣蹇共同鶴
鳴荒苑內魚躍夜潮中若問家山路叨連震澤東

送皇甫司錄赴黔南幕

黔南從事客祿利先來饒官受外臺屈家移一舸遙夜
猿聲不斷寒木葉微凋遠別因多感新郎倍寂寥

舒州酬別上鄉

故交他郡見下馬失愁容執手向殘日分襟在晚鐘鄉

心隨皖水客路過廬峯衆惜君材器何為滯所從

早鴈

逐暖來南國迎寒背朔雲下時波勢出起處陣形分
急奔前侶行低續後羣何人寄書札絕域可知聞

夏日會修行段將軍宅

愛君書院靜莎覆蘚苔濃連穗古藤暗領雛幽鳥重樽
前迎遠客林杪見晴峯誰謂朱門內雲山滿座逢

經杭州


郡郭遶江濱人家近白雲晚濤臨檻看夜艣隔城聞浦
轉山初盡虹斜雨未一作半分有誰知我意心緒逐鷗羣

秋日陝州道中作

孤客秋風裏驅車出陝西關河午時路村落一聲鷄樹
勢標秦遠天形到岳低誰知我名姓來往自淒淒

瓜州送朱萬言

渡頭風晚葉飛頻君去還吳我入秦雙泪別家猶未斷
不堪仍送故鄉人



華陽集子非熊詩附